



## **Messadi davart la radunanza communal digls 23 d'otgover 2019**

Stimadas votantas, stimos votants

Suandontamaintg az infurmainsa dallas tractandas, tgi vignan discutadas e deliberadas a caschung dalla radunanza communal digls 23 d'otgover 2019.

### **Protocol dalla radunanza communal digls 19 da fanadour 2019**

Digl protocol dalla radunanza communal digls 19 da fanadour 2019 ins ò savia piglier in-vista u tg'el ò savia neir retratg a parteir digls 9 d'avost 2019 durant 30 deis an canzleia communal. Ainfer chel termin èn neidas inoltradas nignas protestas. Igl protocol vign damai declaro per approvo e sottascretg digl mastral e digl protocollist.

### **Alvagni: Amplificaziun digl concept da pastgiras e bavradoirs - credit supplementar CHF 300'000.00**

A caschung dalla radunanza communal digls 25 d'avregl 2018 è nia delibero en credit brut da CHF 575'000.00 per igl project digl concept da pastgiras e bavradoirs ad Alvagni. Chel cuntigna l'amplificaziun digls bavradoirs sen las pastgiras communalas da Foppas, Plaun sulla Sesa, Aclas Davains ed Aclas Dafora scu er la renovaziun dallas quatter munscheras dad Aclas, Valiabgias, Curmegl ed Alp da la Creusch ad Alvagni. En'examinaziun posterioura digls provedimaints d'ava dallas Aclas Dafora ed Aclas Davains ò demusso, tgi chellas sa cattan parzialmaintg an en schlet stadi e tgi correspondan oz betg ple allas preten-siuns d'indrezs da provedimaint d'ava da beber. Las tschaffadas d'ava ed igls tumbigns dallas funtangas ston neir renovos. Chegl vala er per la lengia d'ava da funtanga ad Aclas Dafora anfignen tar igl reservuar, en conduct tgi exista da rols vigls da teracotga. Tenor igl sclarimaint cun igl uffezi d'agricultura e geoinformatica pon chellas maseiras neir integradas

scu amplificaziun aint igl project digl concept da pastgiras e bavradoirs ad Alvagni e neir sustigneidas cun contribuziuns cumuladas da 65 % ve digls costs cun dretg da survegnair contribuziuns.

Cun l'amplificaziun digl project preschento vignan renovadas las tschaffadas d'ava ad Aclas Dafora ed Aclas Davains e messas an en stadi conform ad ava da beber. Igls tumbigns da funtanga appartenents vignan ramplazzos digls reservuars prefabritgias. Pinavant vign la lengia d'ava da funtanga Aclas Dafora anfignen tar igl reservuar, ramplazzada sen ena lunghezza dad 850 m antras ena nova lengia sutterana da material sintetic, da polietilen cun en diameter da 90 mm. Igls costs d'investiziun appartenents montan CHF 300'000.00. La confederaziun ed igl cantun rancanoschan CHF 202'000.00 da chels scu dretg da survegnair contribuziuns. La sminuaziun da CHF 98'000.00 succeda perveia dall'interessenza betg agricola dallas total 49 tgesas da vacanzas/aclas (49 x CHF 2'000.00). Las contribuziuns dalla confederaziun e digl cantun montan uscheia CHF 131'300.00 per l'amplificaziun digl project preschaint. Agl cumegn Albula/Alvra restan costs da CHF 168'700.00. Igls costs totals d'investiziun per igl concept da pastgiras e bavradoirs ad Alvagni s'augmantan uscheia sen CHF 875'000.00 ed igls costs restants a gravezza digl cumegn Albula/Alvra sen CHF 370'600.00.

La suprastanza communal propona en credit supplementar da CHF 300'000.00 per l'amplificaziun digl project da pastgiras e bavradoirs ad Alvagni.

### **Surava: Concept da pastgiras e bavradoirs – credit brut da CHF 330'000.00 (incl. TPV)**

A Surava sa cattan las pastgiras communalas Tuliz, Plaz Buanogn, Val Satgen, Pro Surava, Plan la Resgia e Val Gronda. An collaboraziun cun igl uffezi da gôt e prieveils dalla nateira digl Grischun è nia statuia per chels areals ena regulaziun da pastgira aint igl gôt.

Cun igl project preschaint, concept da pastgiras e bavradoirs Surava, duessan chellas pastgiras communalas neir sclareidas. Ultra da chegl duessan neir erigias bavradoirs novs per chellas pastgiras tgi on nign access ad ava currenta, numnadamaintg las pastgiras da Tuliz, Plaz Buanogn, Val Satgen e Pro Surava. Cotras pò la pressiuon necessaria da pascular neir garanteida per impedeir cotras tg'igls areals sclerias creschan aint danovamaintg. Igls costs d'investiziun montan a total CHF 330'000.00. Igl uffezi da gôt e prieveils dalla nateira sustigna igl project cun contribuziuns an import da 70 % ve digl andamaint da lenna. Tenor igl uffezi d'agricultura e geoinformatica pò per igls bavradoirs nia chinto cun en sustign da radond 65 % digls costs cun dretg da survegnair contribuziuns. Uscheia sa resultan costs restants a gravezza digl cumegn da radond CHF 135'000.00.

La suprastanza communal propona en credit brut da CHF 330'000.00 per la realisaziun digl concept da pastgiras e bavradoirs a Surava.

## **Chint annual 2018 digl cumegn Albula/Alvra**

Igl **chint current 2018** sera cun en retgav total da CHF 15'058'366.79 e costs totals da CHF 14'595'922.88 cun en surple d'antradas da CHF 462'443.91. Tigls costs totals èn codeschedas amortisaziuns ordinarias dalla facultad administrativa da CHF 802'633.05 ed amortisaziuns supplementaras dalla facultad administrativa da CHF 864'300.00.

Tar la facultad da finanzas èn neidas fatgas correcturas da valetas sen dabungs an import da CHF 733'418.00. I sa tracta lotiers da dabungs anvers proprietarias e proprietaris da bagns immobigliars pertutgias tenor la procedura da perimeter ve dalla sanaziun dalla Voia Tgaplotta a Brinzauls/Brinzauls. Davart l'annullaziun dalla suspensiun resp. davart igl proxim proceder pertutgont igl incasso, decida la radunanza communal a taimp inditgia sen proposta dalla suprastanza communal.

L'atgna finanziaziun pigl onn 2018, an somma da CHF 1'585'567.00, mossa danovamaintg ena reducziun considerabla an cumparegliaziun cun igl onn passo, CHF 2'042'115.00.

**Igl chint d'investiziun 2018** sera cun expensas da CHF 4'567'113.55 ed antradas da CHF 1'766'296.00 cun investiziuns nettas da CHF 2'800'817.55. Las investiziuns bruttas sa basan agls credits approvos dallas radunanzas communalas e dalla suprastanza.

**La bilantscha per igls 31 da december 2018** preschainta activas e passivas da CHF 26'801'557.62. La facultad administrativa è s'augmentada per CHF 1'190'915.65 an consequenza dallas investiziuns nettas da CHF 2'800'817.55 e risguardond las amortisaziuns ordinarias e supplementaras da total CHF 1'666'933.05. Igl capital agen è s'augmentato per CHF 462'443.91 ed è documento per igls 31 da decembr 2018 cun CHF 11'972'907.26.

Digl chint annual extendia per igl 2018 digl cumegn Albula/Alvra, pò neir piglia invista sen la homepage [www.albula-alvra.ch](http://www.albula-alvra.ch) u tg'el so neir retratg tar la canzleia communal a Casti.

## **Albula/Alvra: Rapports da gestiun / rendachints finals**

### **- Casti: Veia Gelgia – sanaziun dallas lengias d'ovra**

A caschung dalla radunanza communal digls 15 da settember 2017 on igls votants approvo en credit an import da CHF 275'000.00 per la sanaziun dallas lengias d'ovra. Las lavours davart digl cumegn Albula/Alvra èn terminadas e fatg giu chint.

Las expensas totalas per la sanaziun dallas lengias d'ovra montan CHF 198'591.85. Igl credit delibero è nia sotpasso uscheia per 27.78 % u CHF 76'408.15. Siva dalla deducziun dallas contribuziuns dalla sieranza da bietgs digl Grischun GVG da CHF 12'267.00 vanzan per igl cumegn Albula/Alvra costs restants da CHF 186'324.85.

Igl spargnamaints anvers igl credit lubia son neir mutivos suandontamaintg:

- Gl' on betg stuia neir exequeidas lavours relevantas da costs u lavours impreveidas.
- Cunter la practica usitada èn las expensas per la surstructura neidas finanzteidas cumplettamaintg antras igl uffezi da construcziun bassa digl Grischun (lengias d'ava aint igl trassé dalla veia cantunala / fitg schleta rasada da fundamaint).
- La lengia viglia da cumegn per l'ava persa, noua tgi angal la drenascha dalla veia anfignen tar la construcziun nova dallas lengias per ava meteora era tatgeda, è da l'otra vart dalla veia e vign dismissa a gravezza digl cantun cun la construcziun digl meir.

Casti, igls 3 d'otgover 2019

La suprastanza communal Albula/Alvra